

www.BibleForChildren.org


मत्तयाल 8



इद जर्गुता मूडोव रोजुननाड गालिल राज्येमता काना इनना
नाटे मरमिं मत्तां, आ मरमिने येसुना यावलगुडा मत्ता.
मरमिंकु येसुन, ओना सिस्युल्कुनगुडा केय्सि मत्तुर.



मरमिने अंगुर पानकम मारतस्के, येसुना यावल, “ओरागटा अंगुर पानकम मारसोत्ता कोको,” इंचि येसुन इत्ता. पजा येसुना यावल अगा मत्ता जीतागाहकुन, “ईर मीकु बतल वेहंतोरो, मिमेट अदे कीम्टु,” इंचि इत्ता.



“आ पेरपुल्कुने एर निहाट,” इंचि येसु आ
जीतागाहकुंक वेहतोर. अस्के ओर आ पेरपुल्क
सीगा निंडानाल निहातुर. अस्के येसु, “इंदके
उंदि पेरपुनाल इच्चुर एर पीसि, ई कुळपु हियना
पेद्दा मनकानगा ओम्टु,” इंचि आ जीतागाहकुंक
वेहतोर, अस्के ओर ओतुर.



पजा आ पेद्दा मनकल एतुन गिचचो
उंचि हूळतोर अयते, अद एर पुरागा
अंगुर पानकम आसि मत्ता.
येसु एतुन अंगुर पानकम
कींतोरइद पानकम बोर
तत्तोर, बगाटाल वाता
इत्तद आ पेद्दा मनकंक
तेळिया हिल्ले गानि
आ जीतागाहकुंक
मात्रम एर्का
मत्ता.



पजा आ पेददा मनकल मरमिना पेडन केय्सि,
“अंटोर अय्ते पिच्चर अंगुर पानकम
मोट्टा मोदाला हींतुर. लोकुल्क
पीरनिंडा उट्टारित्ते,
पज्जोटाल सप्पटा पानकम
हींतुर. गानि निमे अय्ते
पिच्चर अंगुर पानकम
इदवेरदाकागुडा
मिगलिच्चि
इरतिन,” इंचि
इत्तोर.




इल्हा येसु गालिल राज्येमता
काना नाटे इचंत्रम आयना
कबळ कीसि, ओना
महिमातुन हुपिस्तोर. इद
ओना मोट्टा मोदाटा चिन्ह
आंद. अदुनहाटीं ओना
सिस्युल्क ओन नम्मुतुर.



पजा येसु पत्रुना लोन वातस्के ओना
पोरड एळकि वासि मींडसि मत्तद
हूळतोर.



येसु दाना कयदुन इत्ता इट्टुडे एळकि रेयता.
अस्के अद तेदासि येसुना सेवा कियालय दल्गता.




पजा पोळ्द होंचि,
लोकुल्क बिमारते
मत्तोरुन, देय्याल्क
पीतोरुन अंटोरुन
येसुनगा पीसि वातुर.
पूरा सहरतोर येसु
मत्ता लोता गलमातगा
जमा आतुर.



येसु तीरतीरकुना बिमार्क मत्तोर वेल्लेटोर्कुन बेस कीतोर,
देय्याल्क पीसि मत्ता वेल्लेटोर्कुना देय्याल्कुन पेचाह्चि
गेदुमतोर. अव ओन एरपाट कियुंदुं, अदुनहाटीं ओर अवुन
वळ्का हिया हिल्लोर.



ओनागटाल पेनदा
ताकत वासि ओर
अंटोर्कुन बेस कियुंदु.
अदुनहाटीं आ मंदि
अंता ओन इट्टालय
हूळसेक मत्तुर.



अद वेलाते नालुर मनकालोर वरोर लकवा
बिमारतोन पीसि येसुनगा वातुर.



गानि वेल्ले गर्दि मत्ताहाटीं ओर
येसुनगा ओया पराहिल्लुर. अय्ते ओर
लोतपोरों कटुल पियानच्यो बांगा कीसि
लकवा बिमारतोन येसुनगा
रेहतुर. लकवा बिमारतोन लोता
पोरोंटाल येसुनगा
रेहमळ . . .




. . . . येसु ओरा
विस्वासमंतुन
हूळसि, आ लकवा
बिमारतोन, “कोको,
नीवा पापाल्क मापि
आतां,” इंचि इत्तोर.
“नना नीकु वेहासेके,
तेदसि नीवा कटुल
तेहकुंचि लोन होन,”
इंचि इत्तोर.



पजा येसु डोंगाते एककुतंका ओना सिस्स्युल्क
इंका ओना पज्जेन एककुतुर. अस्के
समुद्रमते उंदि पेद्दा दुमारम
वाता. आ दुमारम इच्चो
पेद्देद मत्ता गदा, एता
तळाने डोंगा मुळगालय
दल्गता. गानि येसु मात्रम
आ डोंगाते मींडसि
मत्तोर.



अस्के, “अरे विस्वासम तक्को लोकरिटा, बारि वेरियंतिर?”
इंचि येसु ओर्कुन इत्तोर. पजा तेदसि आ वळि-दुमारमतुन
आनि समुद्रमतुन गदरिचतोर अय्ते अव सांत आतां.
अद हूळसि सिस्युल्कुंक पैदा इचंत्रम
आता. अस्के ओर, “अरे ईर बसांटा
मनकल रो, वळि,
समुद्रमगुडा ईना पोल्ले
केंजंता!” इंचि इत्तुर.



पेन दुनियातोकून इच्चोन पावरम कीता गदा,
दाना वरोरे मारिनगुडा ई दुनियातोराहार्टीं
हीता. ओन नम्मना हरेक मनकल नासडेम
आयामन्नि गानि ओन्क बस्केळ्क
पिस्सना पिस्वर दोर्कना इंचि
अद अल्हा कीता.



रोम 3:23 बारित्ते अंटोर लोकुल्क पापम कीसि, पेनदाहेंदाल
दोर्कना कदरताल लक्कु आतुर.

रोम 6:23 पापि कबाहकुना कूलि इंचि मनाकु हामुर दोर्कता.
गानि पेन मनाकु मना सामि येसु किरिस्तुनहेंदाल वरम इंचि
बस्केळ्क पिस्सना पिस्वर हींता.

इब्रि 9:27 बल्हा लोकुल्क अंटोर उंदि मल्का हासि दांतुर, पजा
पेन ओरा न्यायम कींता, इंचि मुन्नेन निरनायम कीसि मंता,

इपीसि 2:8,9 पेन कुर्पा कीताहेंकेन मिमेट किरिस्तुनपोरों
विस्वासम कीतिर. मीवा विस्वासमतुन पीसि मीकु मुक्ति दोर्कता.
इदंता मीवा कय्दाल जर्गतद आयो गानि पेन हींता वरम आंदु.

इद कबाहकुनाहेंदाल दोर्कतद आयो, अदुनहाटीं बोरे पोंगुडतनम
वेहकुना मन्नि.



रोम 10:9,10 अद बल्हा इत्ते, नीवा पिस्वरते, येसुए नावा सामि इंचि निमे तोळ्दाल ओप्कुंचि, 'ओन पेन हातोरव्टेटाल मर्रा जीवाते तेहता,' इंचि निमे नीवा मनसुनाल विस्वासम कीते, पेन नीकु मुक्ति हींता.

बारित्ते मनम मनसुनाल विस्वासम कीतोम इंचि मनाकुन पेन नीतिमंतुल्क कींता. तोळ्दाल ओप्कुत्तोम इंचि मनाकु पेन मुक्ति हींता.

योहान 3:16,17 पेन दुनियातोरकुन इच्चोन पावरम कीता गदा, दाना वरोरे मरिनगुडा ई दुनियातोरहार्टीं हीता. ओन नम्मना हरेक मनकल नासडेम आयामन्नि गानि ओन्क बस्केळ्क पिस्सना पिस्वर दोर्कना इंचि अद अल्हा कीता.

पेन ई दुनियातोरक सिक्सा हिया वेहालय, दाना मरिन ई बूमिपोर्रो लोहा हिल्ले, गानि दुनियातोरकुन पिसागोटालय ओन लोहचीता.



1 योहान 5:11-13

पेन मनाकु बस्केळ्क पिस्सना पिस्वर हीता, ई पिस्वर दाना मरिनगा मंता. इदे पेनदा गवाइ आंद.

बोरयते पेनदा मरिन स्विकार कींतोर, ओनाकु ई पिसवर दोर्कता गानि बोनगा अयते पेनदा मरि हिल्लोर, ओनगा ई पिसवर हिल्ले.

पेनदापोरों विस्वास इरानोरिता! बस्केळ्क पिस्सना पिस्वर मिहगा मंता. दीन मिमेट्टु एरपाट कीम्टु इंचि नना मीकु इव पोल्लें रासा मतन.



मत्तयाल 8-9; मरकुस 1-2, 4; लूकाल 4, 8; योहान 2

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: E. Frischbutter; Sarah S.

Aheri Gondi Bible (esg) © 2022, Wycliffe Bible
Translators, Inc. All rights reserved.

<https://www.bible.com/en-GB/bible/3417/MAT.1>

©2024 Bible for Children, Inc.

www.M1914.org

www.bibleforchildren.org

